

■ COLUMNA

In pled-claf per in siemi

DA BRUNO BLOGG

Jau sun ma dasdà brusc, plain snuizi e tema, bagnads da suaditsch e tge cletg, igl è stà in siemi, dentant in sgarschaivel. Jau ma regord da mintga detagl da quel siemi. En siemi erel jau sin via a chasa la saira suenter la lavur, il chau plain da mails replitgads ed anc betg replitgads e termins passads e proxims ed il figl che spetga a chasa cun pensums da geometria ed il tanc da l'auto probablamain gist vid. Gia la damaun sa chattava l'indicatur da benzin en il sector da la reserva. E quai cun la reserva è uschia ina chaussa. Ins sa mai cu la reserva è nagina reserva pli ed in canister da reserva n'haja natiralmain betg en la valischera.

Il tancadi è gist sper via ed jau n'hai atgnamain betg temp da tancar e stoi tuttina tancar. Cun la carta da credit sa chapescha ed jau hai il sentiment ch'il distributur da tancar communitgeschia plaun, fitg plaun. El è dentant gentil sco adina e dumonda mai curtesaivlamain per plaschair d'inditgar il numer da la carta. Il numer da la carta è normalmain arcunà en il chau sco numerus ulteriurs numers e peds-claf, tuts indispensabels per ordinar la vita quotidiana. Ma mes numer da la carta è svani. El na lascha simplamain betg pli chattar en las storas da mes tscharvè.

La saira suenter la lavur len blers automobilists sin via a chasa e divers da quels automobilists giran gia dapi intgin temp cun l'indicatur da benzin sin reserva ed ina part da quels garegia da tancar gist en il lieu nua che jau vi tancar. Ed els demussan pouca pazienza, ils emprims cumenzan a tibar, ed in, propi in grobian, avra la fanestra e dumonda sche jau fetschia vacanzas avant il tancadi.

Sin mes frunt sa furman sils emprims daguts da suaditsch, jau vesel avant mai tutt mes numers e peds-claf, quel dal computer da chasa, da la fatschenta, da facebook e twitter. Dad ebay e riccardo e quel dal conto postal e dad e-banking e... ma betg quel da mia carta e la colonna davostiers vegn adina pli lunga e... Il grobian cumenza a far smanis. Jau inditgeschel in numer. L'apparatura refusa gentil. Natiralmain, quai era il numer da pin da mes telefonin.

Jau emprov in'otra cumbinaziun, l'apparatura avertescha ch'i saja la davosa emprova. Duai jau telefonar a mia ex? Nunpussaivel, ella n'enconuscha betg il numer da la carta, mes figl? El valitass mia dumonda per ina sgnocca. Davostiers è il trafic bloccà cumplainamain, jau fatsch la davos'emprova e l'apparatura tragutta mia carta. Tgai far, fugir? Per cletg sun jau sa destadà.

Uschia in siemi è ina catastrofa. Perquai ch'el cuntegn ina part realissem. Dacurt haiel retschavi posta da mia banca. Ina nova carta ed in nov numer. En la brev avertescha la banca da tegnair endament il numer e dismetter la brev.

Obedir è ina da las experienzas fundamentalas da l'educaziun da mes geniturs. Pia hai jau memorisà il numer respectiv il pled-claf e bittà la brev. Dacurt sin via a chasa suenter la lavur. Il tanc probablamain ualti vid. En prescha e cun auters automobilists en prescha sin ils chaltgogns hai, vus cartais betg, inditgà il numer da pin da mes telefonin en la tastatura dal tancadi.

Gentilmain ha l'apparat fatg attent al sbagl e mes siemi è vegni endament. Ed endament è vegni la tecnica da meditar da mia ex. Avant il tancadi haja serrà ils egl, tratg profund e regularmain flad, embridà tut ils termins e la posta electronica ed hai cumenzà a zavrà en las storas dal tscharvè tut ils peds-claf e numers d'access. Ed jau hai chattà la dretga cumbinaziun. Magari fa l'egliada sin l'indicatur dal tancadi mal cur ch'ins vesa la disproporziun dal quantum benzin visavi al pretsch a s'anzar pli e pli. Quella giada è quai stà a mi dal tutfatg tuttina.